

Judagöreŋ Kimbi

Judanöŋ Kimbiŋi alök.

Jim-asa-asari

Juda mi Jisös aka Jeimsgö munŋi. Tosatŋan “Kraist möt narizin,” jiba keu gongonŋi ambazip kusum sohom eŋgiba malgeri, Judanöŋ yeŋgöra aka galöm meme keu ohoyök. Buŋa Kimbi ki töröptökŋi. Keuŋi mi 2 Pitö 2 keu miangö dop. Judanöŋ Kraistkö alaurupŋi neŋgö urunini kewö kuŋguyök, “Anutunöŋ nini nalö dop möt naribingöra mötnariŋ neŋgiiga könagesöurupŋi akzini, eŋön mönö mötnariŋŋinan sehiba köhöimapkörä toroqeba bim qeba malme.”

Buk kiaŋgö bahöŋi bohonŋi 4 mi kewö:

Keu mutukŋi 1-2

Böhi sohoboho yeŋgö könaŋini aka jimteköteköŋini 3-16

Toroqeba pöndaŋ möt naribingö jimkutukutuŋi 17-23

Kötumötuet keu 24-25

¹“Juda bisop Jeimsgö munŋi nöŋön Jisös Kraistkö welenŋi qeba urumeleŋ alaurup embuk keu eraum mötpingöra kaba kimbi ohozal.

Anutu Iwinöŋ eŋgohola uru könömŋan jöpaköm eŋgii Jisös Kraistnöŋ sel jöhöm eŋgiiga malje.

²Anutunöŋ mönö ak kömumba urukalemŋi keleŋmaleleŋ eŋgiiga luainöŋ malme. Mewö.

Buŋa keu möwököwöramgö galöm meme keu.

³O wölböt alaurupni! Anutunöŋ amöt qem neŋgiiga letota mohotŋe Suepkö buŋaya akzini, nöŋön miangö keuŋi jim tuariba ohom eŋgimamgö sihimni ketaŋi möta malal. Mala malbi lömböriiga toroqeba mambötamgö osizal. Miangöra ohoba uruŋini kewö kuŋgum eŋgizal: Anutunöŋ mötnariŋkö keu kemaŋi pakpak mi ambazip sarakŋi neŋön

^a 1.1 Mat 13.55; Mak 6.3

memba galöm kölinga qahö utekömapköra ali bujanina akza. Mianğöra böhi takapulakaŋi tosatŋan Buŋa keu lolonqaləŋ akepuköra mönö böŋ kinda bim qeba malme.

⁴Ambazip tosatŋan möndöba urumeləŋ kambu sutŋine ölöŋ ölölöŋgöba kaŋgotketka kənaŋamŋini goŋgoŋi mi aukŋe qahö asuhui malje. Anutunöŋ ambazip mewöŋi yeŋgö keuŋini lök mönövök jim teköiga ohogetka sihimbölöŋinan qakŋine öŋgö-mamgö akza. Anutuninan keuŋi ala kalem möriamŋaŋgö kənaŋi öŋa indelakzapmö, ambazip aŋgöjörakŋinambuk mieŋön mönö nanŋini sero namböŋnamböŋini turumegöra aka kalem möriamgö keuŋi mi möwököwöramgöba möŋaqöŋaigetka bölimakza. Mewö aka nanine Ketəŋamnini mohot Jisös Kraist Kembu ak nenggi-makzawi, i qaŋ köla andö qemakze.

⁵Iŋini keu pakpak mi lök nalö köröŋŋi möt teköba maljemö, tondup galöm meme keu ki ölum eŋgubapuköra kunbuk kewö jim gulim eŋgimamgö mötzal: Kembunöŋ kənagesöurupŋi Ijpt kantrinöhök meköm eŋgiiga kagetmö, kənaŋep tosatŋan nalö kunöŋ qahö möt narim waŋgigetka mi kəndenmöndenəŋ ak eŋgii ayuhuget. Galöm meme keu mi eŋgöra aka kunbuk jizal.

⁶Mewöyök Anutunöŋ Suep garataurupŋi jakömbuak tohoŋini al eŋgiiga malgetmö, yeŋgöreŋök tosatŋan urukönöp aka keu bapŋe qahö anda nanŋini jakömbuak tohoŋini galöm köŋ eŋgibingö urumohot qahö aka selŋini kösököget. Qeŋetal akerəŋgöra aka Anutunöŋ i aköm eŋgiiga jakömbuak miriŋini mosöta etket. Etketka “Nalö ketəŋe keuŋini jim tekömam,” jiba tapepnöŋ (muŋgamuŋa) gwaröhöba pandaman uruŋe al eŋgiiga tata kotkera nalö teteköŋi qahö tat öŋgöme. Galöm meme keu mi eŋgöra aka kunbuk jizal. ⁷Tandök mohot mianğön Sodom, Gomora aka miri tosatŋi liliköba tatkeri, yeŋgöreŋ asuhuyök. Ambazip mieŋön mewöŋanök serowilin aka silegö sihim kömbönaŋini möwöramgöba tandökŋi kun kewö aket: Azi nanŋirök ambi nanŋirök amimba malget. Mewö malgetka Anutunöŋ likeŋŋini melenəŋ eŋgiiga könöp jitŋi teteköŋi qahö eŋgohoi sihimbölö möta mala kota malme. Mewö mala böhi takapulakaŋi yeŋgö galöm mem aŋgubingö kaisöpsöpnina ahakze.

⁸Ambazip takapulakaŋi mieŋön mönö nalö kewöŋe tandök mohot mewöŋanöhök ahakze. Jeŋini meleŋni imutimutŋini laŋ eka mianğöreŋ möndöba wuatəŋgöba nanŋini sileŋinaŋgö malmalŋini mem böliba kölkölŋiŋiŋ miwikŋaimakze. Mewö mianğön Anutu jijiwilit aka jiməŋgot jim waŋgiba kukösumŋi memba et alakze. Mewö aka Suepkö bem suahö ambazip asakmararaŋinambuk euyəŋgöreŋ maljei, yeŋgöra uruqeŋe keu töhöreŋ jim eŋgimakze.

^b 1.5 Eks 12.51; Jaŋ 14.29-30 ^c 1.7 Jen 19.1-24

⁹ Mewö ahakzemö, Suep garata bohonji qetji Maikel yañon mewöyök mewö akñamgö lömböriba osiyök. Maikelnöñ Mosesgö qamötñangöra Bölönangö Toñambuk angururuk aka möndöm-kösök ahök. Mi aka öngöba erökmö, töndup uruqeçe keu töhöreñ mi jim teköm wañgimangöra awösamkakak qahö miwikñaiiba osiyök. Osiba kewöyök jim wañgiyök, “Kembunöñ mönö mindiñ-göm gihima.”

¹⁰ Maikelnöñ mewöyök mi osiyökmö, ambazip sohoboho mieñon mönö sileñini memba öngöba Buña keu qahö möt kutumakzemö, töndup miangöra uruqeçe keu töhöreñ lañ jimakze. Tönpin mala sömbup soñ ewö lañlañ malje. Mötkutukutuñini ölni qahö asuhuiga sömbup malmalgö sihimñini korembiñi miyök mörakze. Nanñini sihim mötmötniñi goñgoñmañgoni mieñon mönö köndeñ engigetka ayuhume. ¹¹ Anutunöñ böhi takapulakani mieñgö likepiñi melenñ engiiga sihimbölä ketani mötmeangöra wöliköba Yei! jizal. Ambazip sohoboho mieñon azi Kein (Kain) yañgö könañi mötöteiba anakze. Könañep kerök azi kembu kunöñ azi qetji Balam töwa wañgiiga Israel ambazip tilipköm engiiga jañjuñ anget. Böhi takapulakani mieñon Balamgö silikni wuatangöba moneñ miwikñaiibingöra urukönöp möta yuai iliñölañ ak bibihiba lañ sohomakze. Azi qetji Kora yañon Moses aka Aron tuarenjoñ ak etkiba köndeñmönödeñ miwikñaiiga ayuhuyöhi, böhi mieñon mönö Kora ewö kezapjupjup aka mala ayuhume.

¹² Urumeleñ eñon urukalem kondel angubingöra tokoba lömbuan algetka takapulaka böhi mieñon mönö miangöreñ mewöyök kamakze. Kaba dogoñini aukñe kondela nanñinanöhök gumohom anguba bau numbu nemakze. Mewö aka engö sile töwötñini boromni boromni gamuñinambuk ewö akze. “Ziozgö lama galöm akzin,” jiba ala engöra qahö mötmöriba kelök keu lañ jimakze.^f Kousu omani töhöntöhön kieñini qahö mewö malgetka luhutnöñ muwutapköm engiiga lañlañ anda kamakze. Ölni ahumapkö nalöñe ipni ipni araroni ölni qahö ewö kinje. Guluñ sinñinanök ewö aka mutuk köhömuñi aka jalöñini malmal köhöikñangö könañeyök qözöla tala kunbuk kömum köhöigetka yahöt aiga köhömuñi kötökni aka malje.

¹³ Yeñon köwet siri kukñinambuk ewö lañ kundutketka ahakmemeñinan gamuñambuk mi qölqölsöt gödöwörötñambuk ewö aukñe asuhumakza. Señgelau tosatñan könañini siñgiba lañ erakzei, yeñon mönö miangö dop jañjuñ qemakze. Señgelau mieñgö dop eta Anutunöñ yeñgöra pandaman göjiwinangö uruñe miri areñgöm engiyöhi, mönö emuyañgöreñ dutje geba nalö teteköni qahö tat öngöme.

^d 1.9 Dan 10.13, 21; 12.1; Ind 12.7; Dut 34.6; Zek 3.2 ^e 1.11 Jen 4.3-8; Jañ 22.1-35; 16.1-35 ^f 1.12 Böhi mieñon törom ewö asamböta tatzemö, wañgeñinan yeñgöreñ qaköba jömgöbapuk.

¹⁴Adamgö sakonjanğö isiŋi qetŋi Enok yaŋön mewöyök ambazip takapulakaŋi mienğö kezapqetok keuŋini qeljiŋe kewö jii ahöza: “Mötket, Kembunöŋ Suep suahö ambazip töröŋi tausenŋi tausenŋi jaŋgö öŋgöŋgöŋi ketaŋi mi engömemba eta asuhume. ¹⁵Asuhugetka körek pakpak nengö keunini jim teköma. Ambazip aŋgöjörakŋinambuk yeŋön ahakmeme aŋgöjörakŋinambuk wuataŋ-göba siŋgisöndokŋini aŋgöjörakŋinambuk aka kotkeri, mi pakpak kewöta mianğö likepŋi meleŋ eŋgiiga körek yeŋgö qakŋine öŋgöma. Pinjit ambazip aŋgöjörakŋinambuk mienğön keu jenöŋ gege gamuŋambuk mianğön Anutu jim qetal waŋgiba kotkeri, mianğö likepŋi pakpak meleŋ eŋgiiga sihimbölöŋini möta malme.” Enoknöŋ galöm meme keu mewö jiyök.

¹⁶Böhi sohoboŋo mienğön jimöŋgot aka sesekŋai ewö ihururuk laŋ jim aŋgumakze. Nanŋini sihim kömbönaŋini bölöŋi wuataŋ-göba tereŋqereŋda sileŋini memba öŋgöba jakbak-öraŋböraŋ ahakze. Ambazip tosaŋi göda qeba kelök eŋguze ewö, mi yuai meleŋda nanŋine eŋgimegö sihimŋi möta kelewele ahakze. Mewö malje.

Galöm meme aka qambaŋ keu tosaŋi

¹⁷Mewö maljemö, wölböt alaurupni, Kembunini Jisös Kraistkö aposolurupŋan böhi takapulakaŋi yeŋgö keuŋini lök qeljiŋe jiget ahöza. Iŋini yeŋgö keuŋini mi ölum eŋgubapuköra galömnini mem aŋguba malme. ¹⁸^hAposol yeŋön eŋgöra keu kewö jiget, “Jisösgö kaka nalöŋan töriiga nalö teteköŋe mianğöreŋ mepaqepaik ambazip asuhume. Yeŋön nanŋini sihim kömbönaŋini bölöŋi wuataŋgöba malmal aŋgöjörakŋinambuk malme.” Mewö jiget.

¹⁹Ambazip takapulakaŋi mienğön mönö sutŋine urujjul ak eŋgigetka simbisembel akepek. Uŋa Töröŋan qahö sölölohöm eŋgiiga gölmegö sihim kömbönaŋi bölöŋan galöm köl eŋgiiga mi wuataŋgömakze. ²⁰O wölböt alaurupni, Anutunöŋ mötnarip qainŋi kun eŋgiyöhi, mianğön mönö tandöŋini bohonŋi öŋgöŋgöŋi ewö akza. Eŋön mönö mötnarip mianğö qakŋe kinda naŋgöm aŋguba köhököhöi miwikŋaimakŋe. Uŋa Töröŋan inahöm eŋgimakzawaŋgö dop mönö yaŋgö ösumnöŋ kinda köuluköba malme. ²¹Anutunöŋ jöpaköm eŋgimakzawi, iŋini mönö yaŋgö urukalemŋe böŋ qeba kinme. Kembunini Jisös Kraistnöŋ ak-kömukömu eŋgiba kunbuk asuhuba malmal köhöikŋe aŋgota oyaekoyaek malme. Iŋini mönö nalö mi kam kuŋgumapköra kapaŋ köla mamböta malme.

²²Ambazip uruŋini meleŋbingö uruyahöt akzei, mi mönö ak kömumba urukalem ak eŋgiba malme. ²³Tosaŋan könöp bölamnöŋ an taköbingö tandök akzei, i gebepuköra mönö wölaŋ öröba bohonŋini jöhöm eŋgigetka letotpeak. Tosaŋan sihim kömbönaŋini bölöŋan galöm köl

§ 1.14 Jen 5.18, 21-24 ^h 1.18 2 Pitö 3.3

enjiiga qemasolokep maljei, i mönö ak kömumba jöpaköm enjiba malme. Mewö malmemö, nanjini malmaljinan bölibapuköra mönö kenjötjini möta malme. Qemasolokep yerjön siŋgisöndokji siŋgisöndokji aketka miajön urujini silenjini kokolak qeiga aukje töwiba maljei, yengöra mönö galömjini mem aŋguba malme. Kölköljijijij akepuköra mönö opo sörönjini töwötjinambuk mi tok sisitjini memba kude misirime. Mewö.

Möpömöpösei keu

²⁴Mönö Anutu möpöseimakin. Yaŋön injini tala et enjuba-puköra sel jöhöm enjimangö köhöiza. Yaŋön ölop enjuaŋgita nanji je mesoholje al enjii aŋgota solanji keujini qahö kinda asakmararaŋi eka söŋgaiba köiraŋ köla malme. ²⁵Anutu mohotŋan Amötqeqe Tonini akza. Kembunini Jisös Kraistnönj nam köl neŋgiiga Anutu möpöseim waŋgiinga qetji aködamuŋambuk aka ahöma. Yaŋön möpŋaŋgö möpŋeyök könahiba kota Öŋgöŋgö-ŋamnini kukösumŋambuk akza aiga nalö kewöŋe toroqeba yuai pakpak ösum-mumuŋan galöm köla nalö teteköŋi qahö Kemu ak neŋgiba malma. Keu mi ölja.